



INATSISARTUNI

Partii Inuit
Randi Broberg

UPA 2014/154-1
30.4.2014

Pillugu: Naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitsisinnaaneq pillugu UKA2014-imut nassuaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Siunnersuisoqatigiit aatsitassarsiornermi aningaasaliisartut sanngisuussusiat aningaasaliisussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiassallutik kiisalu aatsitassarsiornermi pilersaarutit ataasiakkaat siunissaq ungasinnerusoq eqqarsaatigalugu piujuartitsineq tunngavigalugu inuiaqatigiinni ineriartortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalakkersuisunut innuttaasunullu inassuteqaasiortassapput. Siunnersuisoqatigiit katitigaanerat, akissarsiaat pisinnaatitaanerilu pillugit ilutsit periarfissaasinnaasut nassuaammi ilanngullugit nalilersorneqassapput.

(Inatsisartunut ilaasortaq Naja H. Nathanielsen og Sara Olsvig, Inuit Ataqatigiit)

Naalakkersuinikkut arlaannaannulluunniit attuumassuteqanngitsunik siunnersuisoqatigiinnik pilersitsisinnaaneq pillugu ukiamut saqqummiussassamik nassuaasioqqusineq, Partii Inuit ima oqaaseqarfingissavarput:

1.

Partii Inuit soqutigiuarpapput, sapinngisamik siammasissumik tunngaveqarluni apeqqutini suniluunniit nalilersuisinnaanissaq.

Soqutiginartipparput matumanit siunnersutikkut, tamatuma tunngaviusumik isummatta qanillattorneqarsinnaanera.

Naalakkersuisup akissuteqaatimini aatsitassarsiutileqatigiit, siunnersutikkut qanoq isumaqalersinnejqarsinnaanerat kisiat ukkataraa; tassalu naalakkersuinermi 1979’imiilli sanngiiffitta annersariuarsimasa – uagut nammineq pisariaqartitagut aallaaviginagit inuiaqatigiinnik naalakkersuinikkut inerisaaniarneq.

Partii Inuit inuiattut inuttullu atukkatta sunniuteqaqataaffiginerunissaat sulissutigiuassavarput. Tassani tunngaviusumik uuttuutitut qissimigaartuagassagut tassaallutik, uagut inuiattut nammineq soqutigisagut pisariaqartitagullu tunngavigalugit piorsarsinnaanitsinnut aqqutissiuisut periarfissiisullu.



INATSISARTUNI

Inuiattut sunniuteqaqataanerunissatsinni qitiulluinnarput, uagut inuiattut killiffigut piginnaasagullu aallaavigalugit inuaqatigiussutsitta naalakkersuinikkut piorsarnissaa.

Inuaqatigiit akuuffigisatta iluini alloriarnerit suulluunniit, inuiattut uagutsinnut ilinniutinngortinnissaat, taamalu inuiattut uagutsinnut iluaqtissangortinnissaat naalakkersuinikkut suliniutini tunngaviussaaq.

Tassani qitiuvoq inuaqatigiittut sukatigaanitta, tamatumalu malitsigisaanik inuaqatigiinni akisussaafflersuinerup, inuaqatigiinni oqartussaafflersuinerup, minnerunngitsumillu inuaqatigiittut qaammaasaqarnitta qissimilaartuarnissaat – tunuarsimaanngitsumillu nalilersuivigiuarnissaat.

2.

Nunarsuarmioqataanerput eqqarsaatigalugu Partii Inuit soqtigaarput, siunnersuutigineqartukkut isumalioqatigiissitamik pilersitsisoqarsinnaanera.

Isumalioqatigiissitap sammivittut siunertassaa eqqarsaatigalugu, Partii Inuit ilaatigut soqtigaarput maani nunami aatsitassarsiorniarlutik aningaasaliissuteqartut qanimat malinnaavigineqarsinnaanissaat.

Nunarsuarmioqataanerput oqarluartaarutigiinnarnagu akisussaassuseqartumik ilornerussaaq, avataaniit aningaasaliissuteqartut nalilersuivigisarnissaat ingerlattassagutsigu.

Partii Inuit pissusissamisoortipparput, nunani allani nunaqaqqaartut suusupagilluinnarlugit ingerlatsisut, maani nunami qalluisinnaassanngitsut.

Taama oqaaseqarluta Partii Inuit innersuussutigaarput, siunnersuut Inuussutissarsiornermut Ataatsimiititamit aammalu Aatsitassanut Ataatsimiititamit, siunnersuut eqqartorneqassasoq isumaliutissisoqarlunilu.

Partii Inuit taama oqaaseqarluta qujavugut.